

UVOD

Porodica je osnovna društvena ćelija i jedna od najsloženijih, najstarijih, najtrajnijih društvenih grupa. Porodična medicina je djelatnost kojoj je cilj očuvanje zdravlja i liječenje svih članova porodice bez obzira na spol, dob i vrstu bolesti. Provodi sveobuhvatnu i kontinuiranu zdravstvenu zaštitu definirane populacije, pri čemu se porodica smatra osnovnom jedinicom djelatnosti. Predstavlja mjesto prvog kontakta sa sistemom zdravstvene zaštite.

Osnovna organizaciona struktura koja je nosilac poslova i aktivnosti na nivou primarne zdravstvene zaštite (PZZ) je tim porodične medicine.

Tim porodične medicine se sastoji od specijaliste porodične medicine ili doktora medicine sa završenom dodatnom edukacijom ili specijaliste druge grane medicine sa završenom dodatnom edukacijom i dvije medicinske sestre/tehničara.

Značajan dio rada tima porodične medicine je aktivni nadzor nad zdravljem stanovništva i nad faktorima rizika za obolijevanje. Vrlo važan aspekt porodične medicine jeste povjerenje koje tim porodične medicine treba da zadobije kod svojih pacijenata.

U svom radu tim porodične medicine je fokusiran na pacijenta i usmjeren na individuu, njegovu porodicu i zajednicu u kojoj živi. Porodična medicina ima specifičan pristup pacijentu, koji tokom vremena utvrđuje poseban odnos sa pacijentom kroz efektivnu komunikaciju.

U okviru modela tima porodične medicine, obučene medicinske sestre imaju proširenu ulogu i odgovornosti. Kao članovi tima porodične medicine, rade na pružanju usluga (u čijem je centru korisnik), koje se kreću od zdravstvene edukacije, promocije, prevencije i rehabilitacije. Obučene sestre porodične medicine blisko sarađuju s porodicama na pružanju potrebne psiho - socijalne i medicinske podrške. Sestre porodične medicine imaju značajnu ulogu u održavanju ažurne evidencije o zbrinjavanju pacijenta jačajući kontinuitet i koordinaciju zdravstvene zaštite.

Od porodične medicine se očekuje porast kvaliteta PZZ, veće zadovoljstvo pacijenata, kao i unaprijeđenje preventivno – promotivnog rada. Shodno tome u svome radu akcenat stavljam na važnost prevencije konkretno kardiovaskularnih oboljenja za koje smatram da su u općini Bosanska Krupa dosta zastupljene. Istražujući učestalost ishemijskih bolesti srca u timu II porodične medicine DZ Bosanska Krupa došlo se do podataka koji će biti prikazani u radu. Prema tome naglašavam koliko je neophodno sprovesti prevenciju faktora rizika za nastanak ove vrste hroničnih nezaraznih bolesti, a što je osnovni zadatak tima porodične medicine.